



Editorial

Kiging zing ah um

I Peter 5:8 “Pilvâng takin chingthei un; la mêlmau Diabol chu sakeibaknei kitum gual in a nêk ding hawl in a vâk vêl vêl hi”.

Pathian mapuina zal in i khualzin nau khawvel hi buai leh thawmhau taka a um zing lai ah Kochuam sung leh mimal damna eipia hat chung nung Pathian lopina chang masa ta hen? Zia gual din mun i din zing lai ua eimau pilna leh thiamna zia k hilo ah i khawsak thei na ding uh hun lemchang ei piatu Pathian dawi gual i khawsak ding uh akul hi.

Christian hinkhua ah pilvang taka khawsak hi thil paw maw ahi. Christian hinkhua khat pilvang taka umlo kitichu amelma pa diabol chun kua hi kane lum thei diam tia vak vel vel a um zing ahi. Ziakiakchun, anuai ahin sakeibaknei leh sakhi chanchin chawmkim chan ala en hitiu.

Story: Nikhat chu sakei hi gil kial takin a vak vel vel lai in, bangma hephalo sakhi khat hi ahung a, hamdawng nek ding amu aneta. Sakei khan zia sakhi kha amu phat in mat tei ding agua pilvang takin sakhi chu achang gu ta hi. Ahileh sakhi chun bang ma dang ngaitualo in muang chang takin hamdawng chu anak zing lai in tha khatlo in sakei khan sakhi kha

aki mat a ane tai. Sakei khan zia sakhi mat na ding achun pilvang kawm in agem hi, sakhi vang chun a an nek ding chau abuaipi ziakin ahinna achan khalaw ta hi. Kiging zing ah um ala hileh chu ahinna chan kha lo maithei ahia, apilvan lo ziakin thina atuak khalaw tai.

Ziagualchun, Christian hinkhua hile sakhi gual ah i khawsaknau mun apat lungmuang taka i um uh ahi chun Bible ah i mu gual un diabol chun sakeibaknei kitum gual ah a nek ding hawl in a vak vel vel ziakin val zaw in um kha hitiu. Tuni la umna mun chu athak takin ki ngaitua thak kit chiat ding in adawi um hi. Aziak chu, Christian hinkhua hi

pilvang taka i khawsak ding uhi thil paw i maw tak chu ahi. Zia-ziakchun, tulai mihing a tamza-wte hi Biakin kikhawp khawmna le um talo, insung ziang ale nu leh pa, khanglaite insung maicham ngai pawimaw thei talo aki tamta. I melma pau diabol hin ei thep zaw uh ahi ta diam tithei khawp hial in ihun mat dan ua pat ti ziang thei ahi tai.

Nu leh pa, chaten le tuni i umna mun uhi pilvang taka i um uh ahi nam? Ki ngaitua thak phaitiu. Chun, amasa eima taksa hi ki et akul a, ani na eima insung et apawi maw, athum na Kochuam et thak kit akul in, ali na i nam leh i gam sung et zel apawi mawi. Mihing khat chu a pilvanlo ahileh ama ngawn in haksatna atuak

ding ahi pua, ama ziaka khua hephalote na tiang in gentheina leh haksatna atuak ding ahi. Pilvang taka i um chun, eima ziakin u leh nau, kochuam leh khawtang, leh I nam sung hatsatnan atunkhum ziang theina laka pat hukdamna chan ziang thei ahi. Zia-ziakchun, khaw dang sawt talo in i umna mun chiat un pilvang taka um in thilphalo i pumpel daw thei chiat na ding un kiging zing san um hitiu.

--o0o--

Vansawlchak Pathumte Thugen

Thupuan 14:6-10

By: Rev. Seilunlal Vaiphei.

Thumapui: Thupuan lekhabu i sim ahi chun Pathian thuthung leh thil um dingdan Jesu Christa van a kal to nung ah Kochuam mite'n i hiatmil khak ding uh a gel khawk na ziaka John kiang ah ala puan daw ahi.

A chung ah i taklat gual un Vansawlchak Pathumte thupuan i et chun a chuam chiat hi. Anuai ahin Vansawlchak Pathumte thupuan ala en hitiu. Ziate apat chun mimal leh Kochuam mite'nle eimau din mun tawh kituaka bang i zil daw thei diam uh ti'n chawm chan ala enkhawm hitiu.

“Pathian chu lau unla, chawihawina pia in; a vaihawm hun a tung tangal a; ama chu lei leh van leh tuisuagiat leh tuinakte siampa chu ahiziak in bia un” a tia.

Bible i et chun, Vansawlchakte hin mawpuakna chuam chuam anei chiat dan un alang hi. Khenkhate chu, Chawihawina la sa, tangsam leh sun leh zan ah Pathian lopina pia pawl le a um ui. Vaihawmna kitup tak nei ahi dan uh le ahia daw thei hi.

Pathian chu mihingte chung in bang gual in lungna ziang maleh thu hiatsakna pia masalo in kua ma gawtna apia ngai puai. Zia gual achun, Vansawlchakte hinle mihingte ala ki ginlawk masak thei na ding

un thu hiatsak masak ding ah thupuan abawl masau ahi.

Pathian in, Sodom leh Gomorah khawpi asukmang ding kuan achunle alung hei na ding un Lot asawl hi. Himaleh kua man alung uh ahei lo ziakun, khawpi hoina leh hausat na zosia chu mei in halmang ahitai.

Neneviah mite gitlo na zia kin Pathian achung un alung awi tapua, suk mang thai ziang ding in ala koi hi. Himaleh a gitlo nateu haisan ding leh khawpi suk mang ahilo na ding in Pathian in Jonah chu tangsam ding in ala sawl ta. Neneviah miten agitlo nateu haisan in Pathian ala bel tak ziakun khawpi chu gawt leh suk mang in ala um tapuai.

“Thanhuaina, lungnatna uain, nam zosia dawnsak sek, Babulon khawpi chu a chim tai! A chim tai!” a tia.

Bible ah Babulon kiti hi tulai a “Baghdad” tia nisin thusuaka kilang zing ziang khat ahi. Tuhun ahin Baghdad khawpi hi ahelo le ki um talo maithei ahi. Middle East sung a um ahia, gam hausa tak khat ahi. Hiatthei ding a chun, Bible thu hiat gil na nei te mu dan ahin Middle East lamte hi tawh Europe gamkai lamte hi ala ki buai mun sek ui. Khawvel ah Christian dodaltu pen hialin le a gen sek uhi.

Pathian in lal chuam chuam ala pia sek hi. Himaleh Pathian thu piak sang in mani dawitel nan akhawsak sek ziakun ala thi kha law sek ui. 1948 kum in Independent ala mu hi tamaleh tuni tiang hin aki vai puaknateu piting tak tak thei nai lo in alang hi. Tuni tiang inle Jesu Christa hi ei hukdamtu ahi tin a pawm thei nailo uh ahi. Pathian in avel vel in ahethiam thei na ding un ala tangkiko pi hita maleh lungheina neilo ahi ziakun suk mangthai ah um zel ahi dan un alang hi.

Babulon khawpi chun, banggual in Pathian malsawmna

ala dawng maleu asiamtu Pathian aki hei mangsan sek ziakun achung un Lalpa lungnatna atung sek a, hun hungtung kit ding tiang ale gawtna mu ding ahi danteu a mu thei hi. Zia gual ma chun, tulai gingtute hin i ngaitua nateu hile Babulon mite sang in alu lul zaw ta. I chung ua hin Pathian lung awilo na tamtak vei ala um kha maithei ahi. Tuhi Pathian lam i kile kitlo uh ahichun alungnatna nasa zaw diak hung tung kit ding ahi. “A hun a buting ta hen, Pathian gam chu a nai tai. La gitlo uh haisan unla, chanchinpha hi ging tau in”, ti’n a gen pan a(Mk 1:15).

“Kuale sahâng leh a lim bia leh a chal a hem, a khut ahem ah tepte’na nei chu, ama chun Pathian lungnatna uain no ah kisung chu dawn intin...”

Kua hileh sahâng leh alim bia leh akhut ahem ah tepte’na neite chung ah Pathian alungnatna hung tung ding ahi dante mu daw thei ahi. Himaleh, tuhin khawvel pumpi achup suak ta, ei thingtang mi laka hinle ahung um pan ta hi.

Rev. Th. Singson in ala gen, ***“Tu hun ahin Biakin maicham mun ah lunglut taka khupdin ding kua ma a***

um ta puai. Khenkhatte vang vang chu Lal Jesu min gen lat ding a utlo pawl le a um da talo ahi. I kiginlo kal va khangdawng hinkhua tam-tak puimang ahi ban in nu leh pate na tiang le sahâng lim kiput ah lung awi leh ki thamuan pawl le a um tai” atia.

Exodus 20:3-5 nan ei gen chu, “keima tilo Pathian dang him him la neilo diu ahi... milim siamthu ang ah chun bok-khup kin...” tia eila gen piak hi gel dawk zing hitiu. Zia gual mite chung ahin nat genthei nate, gawt nate leh Pathian lungnatna atung sek hi. Taka Vansawlchakte thugen hi i et chun ahung tung pan chu ahi ta, kisik a lunghei lo te chu Pathian lungnatna uain no ah kisung chu adawn ding uh ahi.

Thukhakna: Suapite haw, Pathian in alungnat khum mite kuama nuamsa a um puai. Ziaziakchun, Pathian lungnatna i pel dawk thei na ding un Vansawlchak thugen hi eimau laka thu ahung gen gual ah ngai in i hikhial nau apat kisik in Pathian kiang kitulut in gitlo thupha chawi hitiu. Pathian hing khut ah pâk chu thil huaisia tak ahi zia kin.

--o0o--

CHRISTIAN INSUNG'A PA DINMUN

Bible chang: Exod.34:7 & Isaiah 38:1

**By Rev. T. Chomkholun Baite,
Pastor, Sugnu Gambih EMP.**

Thumapui:

Insung'a Pa dinmun hi alul in, apawimaw in, Pa nei talou insungte haw chun Pa lultan hi ahechian pen ui. Christian insung hi 'Pa thuneina insung' ahiziakin Pa chu insung'a mawpuakna lianpen nei chu ahi. Aji leh achate, inn leh lou zosia le ama'a ahi. Pate zosia 2021 Pate Nikhua kipakna chibai!!

1. Pa min umzia:

Hebraiten 'Beth-ab' (beth-av) atiu in, 'Pa-In' tina ahi. Pa min leh insung chu kikhen thei-lo a umkhom ahi. Pa umna'a chun insung aum in, insung umna'a chun Pa aki poimaw ahi. Sappau a 'husband' atiu ei pau a pawsal/jipa jong hi. Anglo-Saxon te pau a 'house-band' a kipat ah kilad-awk ahin, zia chu 'insung kaigompa' tina ahi. Pa chun insung a enkawltup in, avengbit in, chuleh athunun ahi. Bible ale, "Numei, Pawsal nei chu a damsung sia a pawsal neina dan a chun kân in a um a; himaleh a pawsal athi leh chu pawsal neina dana pat chun thadaw ahi tai" (Rom.7:2) ati. W.M. Rayburn chun, "Pathian in 'Pa' min asakna jïak chu Pathian

in ama thasang a insung enkawltup ding'a angansia nuam jïak ahi. Pathian chu 'Pa' tin I ko un, chate chun Pa Pathian imutheilo jïak un leisiet'a apa te hepina'apat in van'a Pa lulna leh ja umna chu ahethiam thei ui" ati ahi.

Amavang, Pa chun amin-lulna chu ahindan'a a etsak zawlo leh Pa Pathian min asusia in, achaten le Pa Pathian ja umna chu ahethiam thei pua'u. Pa hina hi mawk maimai ahi puai, athuneina lam'ah eng umtak himaleh, amawpuakna giktak ahi. Thuneina cho dawi ah, a mawpuakna sem buting zolo Pa chun a dinmun azolo jawk ahi.

2. Pa thuneina:

Thuthunglui hun'ah chun

Pa thuneina hi kuama'n a nialkal thei puai. Isaac chu apa Abraham in Pathian kiang'a a lat-daw chun kuama adawng pua'n, ama leh Pathian kikal thu bep ahi (Gen.22:1ff; 2 Kings 3:27). Jephtha in achanu thilpiak ah alatdaw ding chun kuama adawng puai (Judges 11:34-40). Moses dan thupiak chun, khautak in chate chun nu leh pa thu angai ding in ahil'a (Exod.20:12; Deut.5:16). Thu ngailou chate chun anu leh apan thutan vaihawm a pang upate kiang ah puilut in, a chapa'n athungai lou dan gen intin uh, zaw phat leh khopi sung'a mipiten suang'a aselup jiang di'u ahi (Deut.21:18-21). Kua hitaleh apa ham anu ham deng'a chu tha tei-tei ding ahie (Exod.21:15,17). Pawsal khat chun achanu chu suak'ah azuak-daw thei ahi (Exod.21:7) tihaw hi Pa thuneina Thuthunglui ah kimu chu ahi.

Thuthungthak a le Pa thuneina chu asang mama hi. Lalpa Jesu'n le Pa thuneina hi apawm ahi (Matt.15:4). 'Christa chu pawsal zosia luchang ahin, pawsal zosia numei luchang ahin, chuleh Christa luchang Pathian ahi' ti chu heleu chun ka nuam ahi,

tin Paul in agen hi (1 Cor.11:3). Chaten nu leh pa ajabawl ding, nu in Pa thuneina ajabawl ding, Pa chun ama sang'a lu zaw Christa thuneina chu jatak ah abawl ding, achuti louleh muthei lou a Jesu chu a hepi thei puai. In zosia chu mi khat sakdaw ahi chiat in, ahin bang ma zosia sadawkpa chu Pathian ahi (Heb.3:4). Pa chun Pa ahivang in ajinu leh achate chung'a thu amawk nei ah vaihawp ding hilo in Bible gen gual in 'Pawsalte haw, khrista'n a kochuam a hepi a, a thasang ah akiapiak gual in, nang unle la ziteu hepi un' ati (Eph.5:25). Chaten le nu le pate thu angai di'u ahi (Eph.6:1).

'Lalpa ah' tihin nu leh pate chu Lalpa hina apoimaw dan ataklang hi. Zia tawh kidungzui ah chun 'Pate'n le chate alungnat sak lou diu, Lalpa thununna leh zilgaina chun kaihuai ta un' ati (Eph.6:4). Pa thuneina chu Pathian lunglam ahilou leh Pa chun adinmun alua zolo ahi.

3. Pa chu insung thiampu ahi:

Thuthunglui hun ah kipat in insung hi Pathian houna poimaw tak ahia, zia chun Pa chu thiampu (priest) ahi. Sakhua thua

numei chu a pawimaw ngai lo vang un, Pa dinmun hi apoimaw mama hi. A insung mite ding in maicham asiam sek hi (Gen.12:7; 26:25; 33:20); achate pawsal ho chu ni 8 atin phat leh zektan ahi sek ui. (Gen.17:12; 23-27; 21:4; Lev.12:3). Achapa piang masapen chu Pathian kiang'a alandawk ah (Exod.13:11-16); achate chun apa malzawlina chan chu hamphatna a gel in a ngakla'u a, chan lou ding alau ua (Gen.27:1-40; 40:49). Job inle, "Ka chapate hi gilo sa hin tin uh, alungthim unle Pathian agensiat sau le hithei ahi" ati (Job 1:5). Pa in sakhua thu ah a chate ahil chu chate ding in kivenbitna ahi (Pro.6:20-24; 7:1-4). Achangleh Kut nekkhom anek phat uh leh le Pa chun thiampu dinmun alua sek hi. Chiakan Kut gantha abawl ua anekkhawm phat uh leh Pa chun Chiakan Kut umzia chu ahilchian sek hi (Exod.12:21-28).

4. Pa chu insung thununtu ahi:

Nu chun insung chu alimsak ah, Pa chun insung chu jana in a-uap hi. Christian insung chu kilungsiatna leh thununna kigawm'a etkawlahia. Kilungsiatna leh thununna diktak chun

insung chu zalenna leh lauthawng nate avengbit zo hi. Zia tak ah chun Pa chu thununtu hina achang a, nu chu lungsiatna aching hi. Insung kithunna'a chun atangpi'n chaten Pa sang in nu abel zaw'u. Amavang, lauthawngna leh thil haksatna a chaten nu sangin pa abeljaw kit ui. Linling phat leh nuten chate lau lo dingin athep vang in Pa'n agen leh chaten abel zaw'u. Ziaziakchun Pa chun insung thununtu, vengbittu leh thamuantu ahina ataklang in, Pa thununna nuai a hin bitna (security) aum sekahi. Nek leh chak hawlina, in leh lou machalna ding'a hin numei leh chate chu lungke male'u, Pa chun, "Lunggim ki'u in" ati phat leh insung chu a thamuang sek hi.

5. Pa chu insung'a vaihawm ahi:

Pa chu insung umdan vaihawm thiam mi hiding ahi. Juda leng Hezekiah le leng loupitak ahivang in a insung avaihawm tup zo puai. Zawlnei Isaiah kiang'a, "La insung siamtup in, thi ding la hi ta ngal in; damdawk talo ding lahi tai" tin agen ah (Isai.38:1). Leng Hezekiah chu adamlona zalkhun'a akingaitua

pum in a pauchap ta, ahileh Pathian in a pauchapna chu asanpiak ah, a insung siamtupna di'n kum 15 a damkum ajawp piak hi (Isai.38:5). Ziakiakachun Pa mawpuakna chu insung puaktup hi ahi. Pa tamtak in a dawu gual un ama insung pua tup manlo in a leisiet hinkhua achia ta, hung kile kitlou ding ahi tau. Tuni ah dam nalai Pa te hin insung puatup manlo ah thi ding lau hitin uh, Pathian in ka zinna a hin insung puatup thei ding in ei mangcha leh tihi dawu a um hi.

Douglas Mac Arthur chun, "Sepai kahi'n, sepai hangsante kipakman vel tamtak kamuta ahi. Zia kipakman lawna chu haksa kasak vang in ka insung puaktupna hi ahaksa kasa zaw'i" ati. Napoleon hile mi minthangtak ahivang in ajinu Josephine athu zaw zo pua'n, gamsung vaipuak tup sang in insung puaktup ding haksa asa zawi. Bible in, "Nawchizuak nu ziakin pawsal pakhat chu vaithum themkhat mai a chang thei hi.." ati (Prov.6:26). Kochuam lamkai hinuam chu ama insung puatup thiam hiding ahi ati (1 Tim.3:4). Thiampu Eli le sakhua lamkai pha ahivang in Pathian hawitak

ah achate gitlona angaikhawklouziak in gawtna huaisetak amaitua ahi (1Sam.4:17-22).

6. Pa chu suantu bul ahi:

Bible a hin mihing khanggui thu agen tam mama ah, zia mawpua chu Pa ahi. Khanggui phalou chu akhang ah mi zosia tawh a mangthai gam sek un, khanggui pha vang gentheina tawp tiang ale aki hinsua thei ui. Leng Herod le lal hen lang, lian maleh le Caesar Augustus in, "Herod chapa hi sang a vokcha kiji leh I hinkhua bit zawna" ti'n ala gen hial hi. Pi le puten le zinei ding kuan phat leh azi dingte'u khanggui ala sut sek uhi a pil mama ui. Jerusalem a kochuam nasem ding'a atun ding kuan unle mi genphat/minpha changte bep tel ding ala tiu a (Acts 6:3). USA a pawsal mi 2 khanggui asut ua, amau chu Jonathan Edward leh Max Jukes te ahiu. Jonathan Edward khanggui a Pathian ginna le thilpha tamtak acha leh atu khang chan in amudawki ui. Alang khat'a Max Jukes khanggui chu Pathian ginlona leh hansialawna tampi acha leh atute khang chan in amudawki ui akitia. Ziakiak chun khanggui pha ineitheina di'n

'Pa' in pan lak ding a pawimaw ahi. Tu'a Pa dinmun chang zosia hin kidak umtak vannuai leisiat l nutsia lo uh leh Pate thiamlona chu Pathian in achate leh atute chung chan tiang ah phul jing thei, khang 3/4 tiang ale phul jing jiang thei ahi (Exod.34:7).

Christian insung'a Pa khat hina adinmun kihet lou chu 'Pa vakmang' tina ahi. Ziaziakchun, Pastor Elvis Nehlal Haokip in la asiam, "O ka inneipu na vanglim kabel, hinna lampi neijotpih lou diu ham? O e lallukhuh jemhoi ding chu echate ahi. Zion chaten kimna la asah tieng lungmuong in kimna la esa ngam nadiuven? Na ji le nachate hi kikhen louna gam'a neipulit in" ati ahi. Zia hi Pa mawpuakna tasam j'ak'a minu ka-na lâ ahi.

7. Pawsal lahi-

Pawsal kiti hi mi hangsan hiding, zia chun thil loupitak tak abawl dawk'ah minthanna anei ding ti ahi. Guallui lai chun pawsal chun sa-hang atha zo a, agual khat azaw'a, ahansan'a, atha hat'a ahileh 'pawsal lahi' akitia, Tuhin le zia ti gual chu ahi nalai hi. Hilehle, Christian insung'a Pa hin taksa leh thagau

a amawpuakna zosia azaw phat leh pawsal hi zaw kit ahi. Ziaziakchun anuai a hin 'Pawsal lahi' l ti theina di'u phabep en hitiu –

1. Zu la tep sang'a zu chu la nutsia zo ah la jamsan jo leh 'Pawsal lahi'.
2. Phuba lalak sang'a la ngaidam leh 'Pawsal lahi'.
3. La-nu la-pa la nialkal sang'a athu lanun leh 'Pawsal lahi'.
4. Biakin lakai lou sang'a Biakin lakai leh 'Pawsal lahi'.
5. Suicide labawl sang'a lahin zawk leh 'Pawsal lahi'.
6. La nekna kuang sawp di'a lazinu lako sang'a nang in laki-sawp leh 'Pawsal lahi'.
7. Bu lahuan theilou sang'a bu lahuan thei leh 'Pawsal lahi'.
8. Panna bei a lamawk vak velvel sang'a in'a la um thim zawk leh 'Pawsal lahi'.
9. La lung chawm sang'a la lungniang leh 'Pawsal lahi'.
10. Hat tak'a gari latawl sang'a Awltak a latawl leh 'Pawsal lahi'.
11. La khut lamawk tha sang'a lakhut latuk tang zo leh 'Pawsal lahi'.
12. Zi lakawp sang'a khatbep lanei leh 'Pawsal lahi'.
13. Lazinu thugen bep la ngai

sang'a lazinu thu la jui leh
'Pawsal lahi'.

14. Insung maicham siam'a laz-
inu la ngansia sang'a nang in
lapat'a la lamkai leh 'Pawsal
lahi'.
15. La thahatna kisanpi sang'a
la thuak la matchak leh 'Pawsal
lahi'.
16. Numei thugen bangma lo ah
lakawi sang'a apha agen lal-
ak leh 'Pawsal lahi'.
17. Nampi thu la gen sang'a
nampi na hawitak ah la sep
leh 'Pawsal lahi'.
18. Thil bawldi'a mi lasawl
sang'a nangman labawl leh
'Pawsal lahi'.
19. Midang in ahung lau sang a
midang in ahung zâbawl leh
'Pawsal lahi'.
20. Anung lam ah la chut sang'a
Biakin malam ah la chut leh
'Pawsal lahi'.
21. Khamthei a lakisakla sang'a
khamthei la nutsia leh 'Pawsal
lahi'.

Thukhakna:

Christian insung nuam
kipatna ding in Pa in a dinmun
akihet'a, alubawk ahina bang-
tak'a Pathian abel'a; azi leh ach-
ate akaihuai phat leh Christian
insung nuam hi pan bep ding ahi.
Mipa gammang l gam sung leh l
kochuam sung'a atam tak ziakin,
pauchapna tawh thua a pan la
chiat ding in Pathian min in ka
hun chial chiat ui.

--o0o--

KISAMSUI KHAWP HI BUKIMNA CHIKHAT AHI

~K.L. Muana.

Numei te hi a tangpi'n a sam uh a hawi sau nuam sek un, ei mihiam te ngai leh et in a lungdam um sek hi. Zia sammal neu chacha leh ngat chu a hung kankhawp phat uh leh a to bep hilo in, a etlawm mama sek hi.

Numei sam hi phekkhawp ah mel la tak leh pasal te mitmu ah lamdan na leh etlana pholang tu ding ah siamchu hi ngei ding ahi. Sam hawi tak ah kizut mam leh kiphek chu ei nusia tiang un aki enzui vungvung mai ahi. Zia lam thu tam gen talo in mihiam a ding bakkai pani kizawp khawm ngeingei ding ah kangai a um hi. Ziate chu akimat khawm tak leh thil a bukim dan vak genlat ka nuam hi.

1. Keng chu pani ahi'n, a langkhat bep in bangma a sem thei puai.
2. Khup le pani a um kit ah, a pani'u ah pan a lakkhawm lo chun a phatchuam di gual in a kimang cha thei puai.
3. Mit ngei hile a pani a kimat chak lo chun a lamzang ngai puai.
4. Nak le pani ahi'n a pani aki matchak lo chun thil a tuina na ahe thei puai.
5. Lu (head) hile thuak (brain) tawh ngaituana a matkhawm lo chun umzia a nei puai.
6. Kam (mouth) hile a tuina (taste) a neilo chun a tuina ahe pua'n, a hatna di'n le phatchuamna a nei puai.
7. Mihiam ahinle numei leh pasal a um ah ahinla taksa leh thagau ah kimatna a neilo chun bangma a gasua diak puau.
8. Bil hile pani ahi'n a pani'u ah hiatna a nei gel uh chun mihing a ding matchak pawimaw tak ahi.
9. Zia mihiam ah bak chuamchuam te chu Pathian in a piak Hu(hinna) chun a thuneikhum tak leh mihiam chu a thiangtho in siamtu dawidan a ngaitua sek hi. Amavang, nek leh dawn thisan zungzam in zia mihiam ah bakzam te chu khawvel dawidan tisa dan ah a pui phat leh soal- gitlona pawlche tak a sem dawk sek hi.

Zia a chung ah thil pani te hi khat ah, a hung kigawp lo ah, a sep ding dawlchiat uh a seplo phat uh leh, siamtu lemguat chu a bukim ngai puai.

Rev. Khaithiandam Vaiphei
Zomi Christian Fellowship, Guwahati
15 May 2021

Thucha:

I. Pathian hechian tak tak te chu Pathian zalo a um ngai puau hi. Pathian zatak ah hinkhua mang te chu zia gual hin hiat thei ahi: Biakin sunga a ki chut dan u'n, Pathian thawlom a ngai khawk dan u'n, Pathian a dinga hun amat dan ua, Pathian a dinga tha leh zung a piak dan teu in hiat thei ahiu. Bible in "Ia vakchu midang te mu din le vak hen ti ahi." Chuleh, Pathian hechian tak chun Pathian nasep a ngai nep ngai lo uh ahi. Pathian a dinga thil apiak teu zosiau chu Vangam ah go khawl gual in ape diu ahi. Ahin, minphat na di leh mani kisuk latna ding bep ah pe te vang apha gualin ki lang sek ma leu Pathian hiatpi vang hilo di ahiu [Rom.12:1-2].

II. Dinmun lau um:

1. Pathian sathau nu khat hingal ahin Pathian hiatpi hilo,
2. Pathian Biakin kaizing ngal ahin Pathian Thagau neilo,
3. Bible thu, chanchinpha tampi

hengal ahin a thugual tak ah zuilo,

4. Thagau ah hat ka hi kitingal ahin, Thagau hinkhua matdan helo,
5. Pathian a dinga hinna ka phal hi ti ngal ahin Pathian a dinga cheng sawmnga tamsa,
6. Pathian a dinga Sawmakhat [tithe] pezing ngal ahin Pathian lopina dinga pelo,
7. Pathian cha kahi ki ti ngal ahin Pathian hiatpi hilo.

III. Pathian nasep hi mawpuakna neiziak mai ah sep di ahi puau'n, A tiamgam [Vangam] ah "Go" khawl guala ki ngai in sep di ahi. Pathian ah dinga cheng 10, 50, 100, i piak teu, Pathian biakin kai na'n dak kal 2/5 i suk lut teu, Pathian ah ding leh Ama lopina dinga I kiphalna teu chu Vangam ah GO KHAWL ihu ti hiat millou diu ahi. Muthei kinepna neipum ah Pathian na I sep ua chun Thagau lam ngaitua na sangi'n taksa lam ngaitua na chu a

lian zawi ti hiat thei ahi. Mutheilo Pathian nasep sem ihi ziakun mutheilo ginna nei in Ama na chu gin um taka isep ua leh lawman kipak um chu mu di ihi ngal ua.

IV. Khawvel ahin, lungngai, thavai, kana, kipakna haw tawh khawsa khawmzing di aki hi, a ziak chu khawvel gam hi Pathian gamtiam hilo, Pathian gam ahi nailo zia kin bukim na bang gual in del ma leu hin le kipakna kim ki mu ngai lo di ahi. Zia gualma chun damlaini tiam theilo khawvel ah khawsa ihi ziak un khawvel hinkhua hi umchanpha, Pathian pawmtak tawh hinkhua mat zing apha ahi. Chun, khawvel ahin, “KEI” kua ka hi em? chuleh mite'n bang gualin ei mu em? banggu-

al in ei ngai uh em? ti ki etchian zing hi thil pawimaw tak chu ahi. A ziak chu Pathian thu zui dan, mu dan zat chuam chuam a um hi. Khenkhat chu: Pathian thu chu ama mimal hukdamna dinga zui lo midang ngaitua na'n zui, chun ama ngei hukdam a channa dinga Pathian thu ngailo midang a dinga ngai, ama a dinga Bible kisimlo ah midanga dinga sim, ama a dinga thu kiziklo ah midanga dinga zik, ama dinga thu kigenlo ah midang a dinga gen. Ahin, bangkim zosia sang in “KEI” hi kisiam thak phawt leh khawvel ahin, insung, kochuam sung, society sung dam pen di ahi ngal a.

--o0o--

Pâte-Nî**La nu la pa zâ in
(Ephesâte 6:2)***~Khaiminlun Vaiphei, BD*

Thumapôû: Bible ah Pâte-Nî lawp ding ti thupiak mu a hi khel pua chuleh Kochuam mapuina ah hung piang le a hi puai. A hîn zia nibîk hi ginum tak ah sungkuan leh mipi vântâng siampîtingtu Pa tawmngaite nasep hêtpîna leh zâna in mat a hi sek hi. US gam ah hung kipan in tuni tiang a hin kochuam leh gam chuam chuam in mat a hitai. Gam khenkhat a chun St. Joseph's Day March 19ni hi Pâte-Nî chawihawini ah mang le a um hi. Pâte chawihawini hi mun khenkhat in ala um zeuh zeuh mâ leh Pâte-Nî (3rd Sunday of June) hi chanchin chawmchân vak en khawm hitiu.

A hung kipatdân: 1909 kum in Sonora Smart Dodd kiti numei pakhat Nûte-Nî a uap zaw a chun Pâte-Nî le neiding a lung in ala vei mama ziang ta. A pân, mâni masial lo kei ah, kipumpiak in azi têng a beisan nung in insung ah a châte a etkawlina leh mipi vântâng na alasepna hetzing nading nibîk neiding chu a chanu Sonora kitinu hin ala sawm pan ta a hi. 1910 kum in apâ gual ah Pâ tawmngaite chawihawina hunbîk mat dingin Spokane Ministerial Alliance te kiang a chun dawtna (petition) ala pe ta a hi. Pâte ni masapen chu 1910 kum in Spokane (US) gam ah chun mat ala hi, kochuam in pête man-

phatna tâklatna in ala amang ua, a damzing leh fâmta Pâte chawihawina in rose pâk san leh kâng in ala lawm uh ahi. Pâte-Nî hi gam pumpi hêtpi ahi na dingin le Sonora chun ma ala phût zela. Chun, kum 60 lam hial chia zaw nung, Sonora thi masang deu, 1972 kum in US President Nixon chun June 3rd Sunday chu Pâte-Nî ti in amau gampumpi hêt dingin ala puangta a hi.

Sonora Pâ hi banggual mi ahi em?:

Amin hi William Jackson Smart ahia, zi pani ala nei hi. Azi masa Elizabeth damlai in châ panga (5) anei man ah. Chun azi thak Ellen hi a pawsal sôn a hia,

a pawsal masa tawh châ pathum (3) anei man hi. Jackson chun azithak tawh châ paguk (6) anei kit ah, a upa pên numei (Sonora) leh adang sia chu pawsal a hi. Kum 56 a hi in azithak in nâu aneinân abeisan kîh ah zia hun a chun a chanu Sonora chu kum 16 vel bep a hi nalai hi. Kapa hin châ 14 enkawl in Nu dinmun leh Pa dinmun ala kawp hi ti in a chanu Sonora chun ala gen hi.

Jackson hi mipi vântâng a ding inle mi tawmngai a hi tihi chanchin suite a pat in muthei a hi. Ama hi apian (1842) na Arkansas chu Confederation state himaleh American Civil war lai a chun 1863 kum in Union Pawlte sepai lak in ala um a hi. Ama hi 1919 kum in ala fâmta, mi tamtak in ama hi Civil War lai a chun Confederation leh Union te a dingin ala pang gêl in a gen ui. Pâte-Nî chawktho tû himaleh Jackson hin ama zâl ah Pâte-Nî a hung um ding hi athil tup a hi ding ginchat a umpuai, ama zâl ah mat a hung hi ding hile a het lawk ding taksan a umlo ahi.

Pâte-Nî mat a phatlo na:

Pâte-Nî tihi pawsal khenkhat in sumkawl veina bep

ahi ti in a dodâl uh a hi. Pâte-Nî matna ah thilpiak chuam chuam kichawsekte chu tâklang in aphot chuamna sang in a siatna a tamzawi ti in nial kalna a um hi. Kum 1920 a pat a 1930 tuamvêl a chun Nûte leh Pâte-Nî gawp khawm a Nû leh Pâte-Nî (Parent's Day) lawp zawk dingin pawlkhat chun ala phût kîh ui. Zia pawl te chun Nû leh Pâte-Nî hi it leh zâ khawm ding a hi ti in ala tângko pi ui. Pâte-Nî mat chuam khel khel hi dodaltu pawl ala um mâleh a la chia zawmzel hi.

Hun hung kivei zêl in a mang udlo pawl um mâleh Pâte-Nî chu pawsalte a dinga "Second Christmas" ti thei khawp hial in van thupi tak tak tawh lawp ahunghito zel tai. Kidopi nîna (World War II) lai a chun Pâte-Nî hi America sepaite zâna leh panlâkna tawsawtna in mat a hung hi pek hi. Kidona tawp zaw nungin Pâte-Nî hi America gam pumpi in puanzâk hinailo mâleh gam vaipawtên ahet pi a hung hitai. Mithiamte sui dân in kumkhat a hin sum \$1 billion (₹100 Crores vêl) vêl hi Pâte-Nî thilpiak (gifts) man ah sên in a kkuat dawkh uh a hi.

Mat a phachuam em?:

Tôlai kochuam khen khat in Nûte-Nî, Pâte-Nî mang a um ah, Nû le Pâ-Nî (Parent's Day) bep mang le um, khenkhat in a pani mang le a um ui. Zia nibîk matdân hi a phat chuam leh chuamlo chu eima matdân zil in aga um ngei in ah. Innsung ah Pâ tawh kiho thei bêklo a hînlah midangte mû thei ding social media ahilo leh biakinn ah thupi deu a kichei na bep ah I mat khak uh ahi chun Pâte-Nî mat hi Pâte sum ma sên na bep hîntin, chuleh mi mit lâkna dingmai leh a kilawmsak nabep ah mang kihi kha ding a hi.

Mat ding ah ala phût masa te lunggel gual ngei ah I mat a hi chun zia nibîk hi mang thawn keilo I hi ding uh ginchat a um hi. Innsung etkawlna, sumle pai hawnân innsung ah dam tak ah kihona um thei talo, a hilo leh Pâte sepgimna musing tho hinapi Pâte kiang ah kipâk thu gen haksasa mama ziang, kipâkthu gen hi naupang huai sa hi maithei, a hilo leh Pâte nasep ding mawng ah gêl ziang le ki um kha maithei a hi. Lunggil a patin, titak zet a Pâte chung ah I kipak na Pathi-anmin ah I suklat ua I chawihawi a hi chun Pâte a dingin ki-at um

mama ding a hi.

La nu leh pa 'zâ' in:

Ephesâte 6:2 na a chun "La nu leh pa zâ in; (zihi thupiak leh thutiam um masa pen chu a hi;)" ti imu gual un, Nu le Pa zâ chu gingtute a ding in thupiak leh thutiam um masapen ahi ngal ah. I Bible châng tâklatna ua 'zâ' tihi Greek pau a chun τιμῶ ti a hia, English a chun *honour/regard/reverence/acknowledge the status of someone* tina a hia. Khawtâng thil ah I la chin sek dân ua chun mi thupi a hilo leh mi lawting I sak têu I zâ na etsak dân uh chu a hi leh mipi mai ah thupi deu a pâkhi awsak a hi bâkin theitawp sua in I dawmsâng sek uh a hi.

Nu le Pa I zânâu chu lam-pi chuam chuam leh hun dang dang inle etsak zing thei ma a hi. Zia chu dodâl na le hi diaklo in I kochuamtên lem a sak bang un, Pâte-Nî mat ding ah a hun guat nâu ahin kochuam mipi leh mimal in kipâk tak ah I lunggil ua pat Lal Jesu min ah Pâte I chawihawi uh ahi chun Pâte a dingin lungdam um intin, mabân ah a nasep nading unle thathaw um ngei ding a hi. Mawpuakna pawthiamlo Pâ nei ki um maithei,

a hin kingaitawm tak ah chawihawileuhin a mau le kipâk intin ei a dinginle phântin I damsawt na dingle hîn na (Eph 6:3).

Thukhâkna:

Sonora chu apa chung ah a kipâk mama ziak in Nûte-Nî mat a hi gual in Pâte-Nî mat ding chu ala lunggul mama ziangta. Zia gual a Pa fel, a mawpuakna zâmsan lo ah a châte a ding leh mipi vântâng a ding ah a kipiak zaw naga chu tuni tiang in America bep hilo mun dang dang inle Pâte-Nî hi mat a hung hitai. Tûni hin Kristian Insung ah Pâ I hîna ah I mawpuakna bang tiang in I

pawzang zêl na em ti khaul thak zêl hitin, Châtên le I Bible in ei kawkmugual in ki ngaitawm tak ah ahi di gual in I Nû le Pâ zâ dân thiam ding in iki chial a hi. Pâte-Nî hin sumle pai sêna leh social media bep a tâklang hilo in, a dam nalai I Pâte kiang in I kam ngêi un le I kipak nau sulang hitiu.

Simtu Zosia Pathian in hun malsawmta hen.

Pâte-Nî matnuam

<https://www.history.com/topics/holidays/fathers-day>
(14/05/21)

<https://www.history.com/news/man-who-inspired-fathers-day-civil-war-vet-single-dad> (15/05/21)

<https://www.history.com/topics/holidays/fathers-day>
(15/05/21)

--o0o--

PATHIAN AH KIKULKHUP BEP SUAKCHA DING

Isaiah 26: 20

~Dr. S. Chongloi

England gama Christian te nasatak ah a sawisak lai un, hukdawna din Christian tampi America a ala zamlut ua. Ahinla zia laitak a haksatna leh sukgentheina zosia thuk pum ah chawl lo ah Pathian thupha ala gen jing leh thi channa ginum tak ah pang pawsal khat ala um a, ama chu Donald Cargil akiti. Munkhat a tha di'n sepai ten adel ua Luidung khat ah achoplut leh suang daw khat a chawtpelna lam in lulpam ah achu'n, sepai kuama achawm ngam aum tak lo ziaka chun ala suakcha ta ahi. Ziaziakachun zia tak mun chu "Cargil kichawpna" tin amin vua tau akiti.

Patrick Walker, mi hinkhua chanchin jik khat in Cargil Kipa-kna thupha gen nunungpen ala ngaikhak thu agen ah, Isaiah 26: 20 a, "Ka mite, la pindan sunga lut chiat un" ti hi pansân ahoulim a. Ama'n, "Zia Indan hi bang indan ahia, I umleh kisuakcha thei a, bang tia zia indan sunga um ding ala hilchian ah, mipi atilkho a, i Pathian uh songpi ikisel ua,

athawkgimna mabe a chu puan guala ikituam ua, a thazap nuai a zia thawkgimna bei masia leh, Vakhu'n amuk a olive na ahung puak masia I um uh leh ki suakcha tei tei di ahi" ala ti.

Zia hi ama a dinga athupi gen chaina ahitai. Zia nung a chun Cargil chu aman ua, Suangkul ah khum in, atawp in thiammaw achan ua, a that tau ahi. Tha dinga akai ua chun lampi gei ah mipiet kianga chun a kiko a, "Pathian, thina ding mun ka zawt sang hin, Pathian thu gen dinga Pulpit kazawt ka kichat zawk chu ahe na'i" atia. Zia agen zaw hun sawtlo in ama Pathian kiangin aum tai.

Cargil hi tha dinga a pui lai ua chun alau puai. Aziak chu aman thi thamuanna kichian tak anei zia ahi. Jesu ah kikulkhup tup chet ahiziakin ama dingin thi leh hin chu athupi tapuai. Christian te kisukgenthei lai ahi zia chun Pathian kikulkhup di'n ala tilkho ahi. Tulai hin vannuai pum-pi Covid-19 hipi(nat) len zia kin

Govt in kikulkhup di'n thu eipia'u a. Christian te a dingin taksa inn ah kikulkhup cho hilo in I thagau Pathian sunggil ah kikulkhup ding le hiatmil lo aphai.

Khawvel pumpi a buai mama ta. Zia buaina hi le hun khat leh hung kichai ding ahia. Buai lai hihenla akichai nung hiz-

iangleh le, Lalpa Jesu ah kikulkhup bep hukdam hiding ahi. Zia-ziakchun Isaiaah a, "Aw ka mite, la pindan sunga lut chiat un, kawtpi kikam khum'un. Pathian lungdam kal in kisel mangun" ala ti ahi. Pathian lungnatna apat ah I ki-hukdam zawna ding un Jesu ah kikulkhup hitiu.

--o0o--

THAGAU LAM MITTHUMNA (Johan 9:1-41)

~Rev. N. Dalla Vaiphei

Chanchinpha Johan zik bungkua na thu hi lasim phâttak leh, bang thil la ngaitua daw a umsek em? Cinema bang hitaleh, a chang tute haw dinmun leh lunggêl dingdan haw hi ngaitua khamtak vang um ei vei..!

"Jesu a chia kawm in, mi pakhat a pian ah kipat mitthûm a mu'n."ti in a bul a hung kipan ah, a nungzui te'n a ngaidan uh a hun gen ua, mihing lunggêl leh Pathian lunggêl ki batlo dan Lal Jesu'n a taklang ah, Sûn hi pêtcha Lal nasep pawimaw ziate hun gên zawm in, mitthûm pa a hun sukdam leh, pharisaite haw a hung kisakla na thu uh, tuanthu gual ah ngainop umtak chanchin ala hi ahi.

Zia bung sung ah lungthim ei khawi diak diak khenkhat vak taklang leu hin, eimau â dingah thagau lam mitvakna ahung hi thei khâkleh ti in:

1. Mitthûmpa dinmun:-

Jesu hunlai ah mitthûm khenkhat haw, a diak ah mitthûm

Bartimai te haw bang kha, Lal Jesu chia thawm a hiat mai mai lele, damna ngaicha in a hung

kiko luai luai mai a hi ai khah!

Maleh tuni i simnau Johan bung kuana ah kimu, amin kigen langlo, mitthûmpa hi vang, a kiang ah Lal Jesu hung ding taleh le, damna ding dawi ah kiko nchang he talo mitthûm ala himai talawm hi..!

Lal Jesu chu sudamtu ahi lam hephalo khawp ah, ngawng leh mitthûm ala hi mai ahi. Mitthûm chiat chiat le damna hawl a um ua, damle gawtalo, a hina ah lungawi mai, hukdampa Lal Jesu le thangai chuam talo, ginna dampi thei hina pi ah, gin le gawlo, bang a hem, tile ngaisakna nei chuam talo, mawk lungmuan mai hinkhua chu thagau lam mitthûmna ala hisek ahi.

Chantawk ah lung-awi a phat ma ma lai in, Jesu neilo hinkhua ah lung-awi tak ah umkhâk ding thil lau um tak a hi. Zia mitthûmpa hile, Khrista neilo ah ah lung-awi mai hinkhua mang ala hi laizang ahi. Tulai ah le, thagau ah mitvak ah ki ngai piangthaklo Khrista nungzui ah pang, kochuam leh khawtang ah tawmngai tak ah kisala ma ma mi umthei talua ahi.

2. A nungzuite ngaidan diklo:-

Nungzuite khan mitthûmpa hi ala muzing hiding a hiu ah, a ngaidan uh ala umsa kha zia hin Lal Jesu kiangin a hun taklang uh a hi.

“Hotupa, zia pa mitthûmsa a pian hi ama gitlo ziak a diam, a nu leh pa gitlo ziak a hizaw diam?”a tiu a hi. Zia hin, kua ahem khat vangsiatna tuak kha chu a pâp pua ding ah ngaidan um hi in a lang ahi.

Nungzuite ngaidan gual hile tulai in a bei chu hi diaklo a hi. Mi kua ahem khat chu a hung nat mun thim leh, pâp pua hi'n a, tite, vangsiatna khat tuak a umleh pâp pua hitei in ah ti ah ngaidan nei pai ziang lawi mi a umsek uh ahi.

Ziagual ngaidan nei pai pai ziang chu Lal Jesu'n le awilo chu hi ding a hia, hitia hin a hun dawnhu zaw ahi. “Zia pa hin thil a hi'khial pua'n, a nu leh pa'nle a hi'khial diak puau hi. Pathian nasep ama ah a kilat theina dingin a hizawi.” ti in.

Vangsiatna kiti haw leh chan hawilo chankhakna kiti haw hi, mi tamtak in pâp puakna in a ngaisek ua, pâp kiti hi a umlo kêi chule hikhel puan tin, himaleh vangsiatna leh chan hawilo

chankhakna zosia hi, pâp chu ala hi khel khel diaklo ahi. Zia sân-gah chun, Pathian lopina nasep ei mau ah a hung kilat theina ding ala hizaw thei ahi, ti hi Lalpa Jesu ei ziltildan chu a hi.

Himaleh, tulai ale mi vang-siatna tuakte, bellona ding ding ah vabel khak bailam ahia, eima bel dan dan chule, Pathian in pawm ziang dingle hi diaklo ahi. Mihing lunggêl gual vang, Pathian lunggêl hi zianglo ahi.

3. Mitthûmpa damna thugûk:-

Mitthûmpa khan Jesu a hawl pua, damna hawl inle a kisa sala chuam ta pua, a um um in a ki um mai a hi zawi.

Himaleh, thu kipak um a kiang a piak ah um chu, Lal Jesu'n amit ah tungman anu piak ah, Siloam dîl ah va phiat dia sawl ah a umna chakha a hi ei vei..!

Jesu chu sudamtu hi ziang lele, a damlotu chun ngaichâtna leh ginna a neilo chun sukdam in kuama a um ngailo uh ahi. Mitthûmpa hinle, Jesu chu damna ahi ti a gin theina ding ah chun, Siloam dîl ah a mai vaphiat din sawl in a um khel khel ahi ai khah!

Jesu'n a sukdam him him haw hile, ka hun sukdam ahi, a ti ngai

pua, "la ginna ladampi ahi" a ti zawsek ahi. Taksa leh thagau ah damlote sudam theitu Lalpa Jesu himaleh, ginna neilote sudam ngailo Pathian hikît ahi.

Siloam dîl ah amai vaphiat ding ah sawlna kha taksanglo in, ginna nei talo leh, chianvam puantin, a chiana kha aginna ziak ahi ziakin, zia aginna cha kha a dampi a hung hita a hi. "Nasep ziakin ginna chu a bukim ta ahi." ti ahi ngal a. (Jak. 2:22)

4. Buailona dingah buai:-

Mitthûm pa mit a hung vak a khan, Pharisaite haw kha buailona ding khat in a hung ki sabuai tau ahi. A piantil apat mitthûm ah hung piang pa mit a hung vak ziang leh, thil kipak um ah vak ngai mai ding hileh kilawm pi chuh! Bang tidan ah a mit hung vâk a hem? Kua'n a hi vak piak ahem? Bangni ah amit hung vâk ahem? ti in, buailona ding khat in a kisa buai uh ahi.

Tulai ale mi tamtak te hi, buailona ding khat ah kisa buai a kitam sek a hi. Ziagual mite chu gingtu pharisai haw hisek ahia. Mi'n vangphatna khat a dawn leh khaullo ding tiang tiang khual in a kisa lungzing sek ua, a

diak in migenthei deu a hem in thilthak khat a hung ki lamdaw khak leh, a sum muna khual pai pai ziangte l hi thim chiat uh ahi. Thil him him a phalam ah mutheilo, a siatna lam bep thil ah lung-gêl diklo tak nei khristian hingal mi umthei ahia, ziaqual mite chu thagau lam mitthûm te ala hisek uh ahi.

Mitthûm pa mit hung vak ziang chu, Pathian lopina ahi chulam..! ti mai âwmtak chuh, genbuai na ding sak leh thang hawl ah, dung leh vai ah kisala mai pharisai te chun, a lungtup gual un le lah thil ahi thei taktak diak chuam pua, mitthûm pa'n Pathian lopi zia muchian ah, kipak ah Pathian a chawihawi lai ah, Pathian muchian kisa ma ma pawl pharisaite khan Lal Jesu ah Pathian hina a mutheilo ziak un, Pathian lopina kilatna mitthûm pa chu a Synagogue ua pat in a nawdok nalai sêt ua, Tichun muthei leh pil a kisak lai un, thagau ah mitthûm a kisuak gamtau ahi.

Mihing pilna leh thiamna cheng cheng ki gawm ale sukdam thei hawi hilo, piantil ah mitthûm mit suvak piak chu Pathian thil bawl ahi ti him him taksang theilo pharisaite kha a tawp lam

in a hung mualpho tiat tiat uh ahi. Tu ale, Pathian lopina piakna ding mun ah, kipakna châng helo ah phunna ding hawl hawl mai gingtu i hikhâk ua chun, thagau ah mitthûm khawmulo kihi ding ahi.

5. Pharisaite'n Jesu Pathian hina nawl:-

Tuni i changtel nau ah, pharisaite dinmun leh umchan hi i et leh vangsiat umtak vang ei vei maw..! Jesu hi Pathian hina bukim nei leh mihing hina bukim nei gêl gêl a hi ziaakin, mihing lam mit bep ah a et ziak un, Jesu ah Pathian hina bukim um chu mutheilo in a nawl uh ahi.

Pathian hina bukim neitu a hi ziaakin, mitthûmpa mit a hi vak piak ah, mak a sa ma ma ziang ua, himaleh Jesu Pathian hina chu muthei loin, thagau lam in a mit uh sukhûm in a um uh ahi. A mau â ding ah thilsia ki bawl na le hilo, piantil a pat mitthûm pa mit ahi vak piak ziak ah, Jesu chu Lalpa ahi ti a hung ki thankhâk ding lau ah, Pathian hi ngal Pathian hilo sak gaw ham ham ah kisa-la chu a himai uh ahi. Bangcheng bawl maleu, mi tamtak in, Jesu chu a hun ging tau ahi.

Ki sakhua mi sak tâkluat ziak ah, eimau ah Pathian nasep kilang theilo hikhâk thei ahia, Sakhuaana ngaisân tâkluat ziak ah Jesu nawl khâk thei le ala hi ahi. Tulai ale Kochuam ki puakna dân pawimaw sak tâkluat ziak ah thagau nasepna suktan khâk thei hi talua ahi.

Mitthûmpa hin a ma sudam theitu Lal Jesu kha hetheilo maleh, a damna ding ah thupiak (Siloam dîl ah amai va phiat dia sawl ah a umna) kha a ging ngam ah, a zui ta, damna le a changngal mai a hi. Tulai hun ale, Lal Jesu ging kahi ti ngal ah, athupiak zui nuamlo a kitam ziak in, taksa mitvâk ma ma lele, thagau ah mitthûm kihi khathehi ahi.

Mitthûm pa'n a hiatchian tinten khat chu "masang khan mitthûm ka hia, tu hin vang ka muthei tai."ti hi ahi. (ch. 25) Zia hi thagau ah mitvâk tate zosia'n a mu leh hiatchian ma mau chu hi zing ahi. A pianthak masang hinkhua leh a pianthak nung hinkhua ki danglamna um chuam diaklo gingtu um taleh, lungkham umtak hi ding ahi.

Midangte'n vangphatna a dawn ziak ua, ama ki hi lungngai, ama ki buaipilo midangte

buaipei ah mangthak, pharisaite kha l awimaw maithei ua, tulai inle, pharisai, sadukai, kiti haw hi apawl min in ki phutdok khel-lo maleh, a mau hindan zui zing nalai ki tam ahi. Ziagual mite chu pil kisakna'n a dim ua, midangte musitna'n a dim bawk uh a hi.

Muthei leh he pen l kisak seknau hi, l mutheilo nau suklatna ahia, ching leh thiam pen l kisak nau haw hile l ngolnau tâklatna mai ahi sek hi. Taksa lam ah dân leh dîn he l kisak nau haw hile, thagau lam ah l khawmu nau a tâksap ziak ala hisek ahi. Mi'n Jesu hi a hukdampa dia a pawmlo chun, pharisaite gualin muthei leh hechian in a ki ngaisek ua, a taksa lam mit a vakbek ziaakin thagau lam in a mitthûm sek uh a hi.

--o0o--

GETHEMANE IN EDEN HUAN A SAN LAMDANG DAN

By: Evan. L. Khotinthang

Eden Huan leh Gethsemane Huan kibat lona chu; Eden Huan hansia lawna haw zosia Gethsemane Huan in abang ti san lamdang em ti ala kiholim khawm hitiu.

1. Eden Huan chu; Mihiamte kipukna Huan ahung hin,
 Gethsemane HUAN vang; Mihiamte dindaw na HUAN ahung hitai.

2. Eden Huan achun; Pathian in Mihiam amu'n,
 Gethsemane HUAN chu; Mihiam in Pathian amuna HUAN ahung hita ahi.

3. Eden Huan chu; Mihiam in a lungthim zosia Setan dawidan ah apiakdawna Huan ahung hitan,
 Gethsemane HUAN vang; Mihiam in a hinna pumpi Pathian khut ah a piakdawna HUAN ahung hita ahi.

4. Eden Huan chu; Setan kipakna Huan ahung suakdaw in
 Gethsemane HUAN vang chu; Pathian Kipakna HUAN ahung suakdaw ta ahi.

5. Eden Huan chu; Pathian leh Mihiamte kiguijawpna bawtan'a Huan ahung hitan,
 Gethsemane HUAN vang chu; Pathian leh Mihiamte kiguijawpna atansa Pathian in avel ah azawpmat kitna HUAN ahung hidaw ta ahi.

6. Eden Huan'a Thingphung chu; Mihiamte dinga Thina Thingphung ahung suak daw tan.
 Gethsemane HUAN a kipat Calvary Tang'a Pathian ahung kikhai lupna Thingphung chu; Mihiamte dinga Hukhing na THING KROSS in ahung pang kit ta ahi.

7. Eden Huan chu; Meidil zawtna (Hansia lawna) Huan ahung hitan,
 Gethsemane HUAN vang chu; Van Innuam zawtna (Malzawlana) HUAN tak chu ahung hidaw ta ahi.

MALAM KINEPNA

*By: T/Upa LM. Vaiphei
S.Munnuam*

Lalpan I ma teu ei pui ah Khawvel HI leh GAU lengvel te lak ah malam naw zel thei ding ah DAMNA ei pia tu Pa Pathian kiang in kipak thu I gen uh ahi.

Gingtu te ding ah hinkhua sunuam pen leh kipak sak thei pen hi, gingtu zia ah malam kinepna leh taksan na hi ahi pen hi.

Sam No. 146: 5 na isim chun Lalpa chung ah kinepna zia mite chu mi vangpha ahi ti ei kaw k mun ahi; Lalpa Jesu a Lal leh Hukdampa ding ah kisan ah Lal ah mang te ding in vang bangkim ah akinepnau teu chu ahing in, a taksang sek un ahi, a damlo un a damna ding a dawt phawt uh leh damna a chang sek ua, a lungngai lai tak un le thamuan na leh kipâkna a dawtna khel un a mu sek uh ahi, ahaksat lai un panpitu ding a hawl sek un panpitu ding ahung um zel sek ahi. sum leh pai a pawimaw lai un le a pawimaw na khel un mat ding val a mu zel sek uh ahi.

Ama vang Pathian mel helo te ding in chu kinepna te chu a tak a chang ngai puan, athawn

zaw sek ahi, banggual kinepna a ang in la nei em? tunin ki ngaitua in.

Malam ah kinepna la nei te chu takchan la nawp ahi chun, ama Jesu melhetna nei masan aman nang a ding in bangkim hung guan piak ding ahi.

Kumtuang hinna, Pathian cha la hung hitheina ding in, Kalvary tang ah migilote kithana gual in Khross ah khai kang in a hung um masa ataksa ngei in thina ahung chang in, Vui in a um ah nithum nin hungtho kit in lei leh van ah thunei na piak ahi tai, Matthai 28:18

Ama thu lo in pa'n Pathian in bangma mihiam te ding in a bawl ngai talo ahi, malai in vang Pathian in chapa thu panglo in a nawp nawp a dawt dawt uh a bawl piak sek in, tun vang chapa Jesu Khrista phalna lo in leh hepina lo in bangma a bawl

ngai talo ahi, la kinepna chu Jeu Khrista ahung hi tak ziak in.

Ziaziakchun, unaute kin-gaitua hitiu, l malam ua bang hung tung ding ahi ihe pua ngal ua, dan ni tak leh la kinepna/l kinepna teu chu a thawn hung chang khan na e..... ziaziaka-chun, Khrista ah siamthak la hi, l hiu a ngai ahi, pawlam latdan dungzui in nangma le kisukdanglam ding la guat ah kisiam thak la guatlo ahi chun dan ni tak leh vaihawmna tawp khawk ma ah la ding ngam na diam?

Ziaziakchun, "Aw nang uh semgim leh puakgik pua zosiate haw ka kiang ah hung un, keiman ala chawldam sak ing ka" a tii, Matthai 11:28-30.

Tulai khawvel thigua nun te leh thil suakte hi hechian in malam kinepna hin kalsuan zel in – l thagau a ding ah hinna l chan thei na ding in, gingtute a ding ah kinepna ga kawt kihawng imu chian thei na ding ua Covid-19 hi a hung lang ah khawvel pump-in thina leh launan l dim ta mai ahi, ahin nang leh kei in vang Covid-19 sang in gitlona hi lau zawn, malam ah kinepna chu del ham ham ah chia ah, pangjel thei ding l thagau nun hi danglam sak in Lalpa a ding in hing zing thei ding in Lalpan a thu sim zosia te chung ah ahepina nai zing thei ding in ei malsawm piak ta hen.

--o0o--

I ZABAWL TEI TEI DINGTE'U

~Thangchingmang @Mangcha Haokip
+919383065714..... //

¶ 1. EIMA TAKSA (SELF) :

Eima taksa kihepi ah zabawl teitei ding ahi, nangma tak-sa nangman la kilungsiat ah la zabawl leh midang zabawl na le lachan ding ahi, la taksa la hepi leh zabawl etsakna dinga chun nek phalote lapiak lo ding, taksa suhat thei damna ding nek pha te la piak ding akul hi.

Pathian thu'n zia gual in agen hi :
"Thu la mat ua la nawp phawt uh leh, gam phatna hi hun ne'n la tin uh, ahin, thumanglo ah la huhel uh chun, chemjam in hun vaitan ina; Lalpa kam in ala gen ta ngala" ati. (Isaiah 1:19-20)

¶ 2. PATHIAN ZABAWL DING :

Ka taksa Pathian zabawl na ding ahi tihi hiatmil lo ding ahi, thil zosia hin kipatdawna anei chiat ua mihiam le Pathian apat ihu a, I kipatdawna hetding an-gai hi, kuama'n a tui nekna bul ah ek atha ngai puai, a thiang thei pen ding in asuthiang in aza bawl chiat sek ui, zia gual chun I kipatdawnau Pathian zabawl tei

ding ahi.

¶ 3. NU LEH PA ZABAWLNA :

Nu leh pa hi i muthei Pathian ahi, nu leh pa zabawl hi hinkhua sawtna pen ahi, (Ephe. 6 : 2) nu leh pa douna hinkhua mang chate hinkhua asawt ngai puai. Absolom in apa David a do ziakin thingbak lak in akikhai a athi tai. Nu leh pa hi Pathian mel ah mu ding ahi. Isaac leh anu Sarah in Abraham chu Pathian mel ah amu'u a, Pathian ti'n ako uh ahi.

¶ 4. JI DING/IJI ZABAWLNA :

Khangdawng a kingai laite khawnunga la zi/pawsal ah hungpang ding la dawngma chu la zabawl ding ahi. Mihiam hi suanghawm-leihawm ah kibawt dawk ihi puau a, Pathian lim leh melpu ah ama khut ngei a siam ihu a, Pathian lim leh mel kimuna mi chu zabawl tei dinga kilawm ahi. Kichen nunga le zinu'n pawsal zabawl hen, pawsal inle jinu zabawl tei hen, kua hileh a mihiam chanpi zabawlo kiti chu

ama kizabawlo ahina ban ah Pathian azabawl lona a sulang hi, la zi/pawsal ahiziaka le laz-abawl tei ngai ahi.

¶ CHATE ZABAWL DING:

Entia, chate hi Pathian apat gou chan ahiu a, gil ah ga kipa-kman ahiu. (Psalms 127:3) Nei leh gou hohi ipu ipateu apat ah kilua sawnsawn ahia, ahinlah Chanu-chapa kiti hi Pathian apat kimu gou lulpen leh kipakman chu ahi. Zia Pathian apat kimu chate hi Pathian ape pa l zabawlnau etsakna Chate chungu zabawlna (Respect) nei ding ahi.

``Nangma kizabawl in chuti leh midang zabawlna lachan ding ahi. Lanu-lapa zabawl in lei ah la dam-kum sawt ding ahi. Lazi/ladawng-ma zabawl in la kikal ua hepina gui asiam hawi ding ahi. La chate zabawlin zia chu Pathian gou piak zabawl la hina ahi. Zia haw zosia chungu la siampa zabawl in chuti leh bangkim ah zabawlna lachan ding ahi``.

Ka kipak hi... □ □

--o0o--

CHATE DINMUN DINGA DAWI UMTE LEH A MAWPUAKNAU.

~Kimboi kipgen

- Bangma lam zosia nu leh pa thu a nung ah zabawl ding hi Bible thupiak ahi. Nu leh pa lungsiat ah zabawl chu hin-sawtna leh malzawlna ahi ti imu thei ui.
- Nu leh pa'n chate a lungsiat dan hi chate'n l damsung ua l dit zo na diam uh? Hun chawmkhat sung bep nuten chate khut atu'u a, alungsung un acham zing hi.
- *Chate ching in thiam henla, melpha in melse ziang leh le nu le pan a lungsiat tho tho ahi ti chate'n la geldaw zing uh a ngai hi.
- Tuisik ihu apat a pheichung ua eila pai ua, nawitui ah eila vak uh, ei pua'u ah, l damlo phat uh leh ei zanhapi'u ah, l damna di'u ei ngaitua'u ah, atui pen pen einek sak ua, haksatna tamtak pum a ei hin seilian uh ahi.
- Nu leh pa hi nial ngam ahi puai, musit ngam leh nuaisia ngam ahi puai. A hinnau pum-pi ei dinga aphal ngam uh ahi. Eite lethuk zo gual ahipuai, a kipakna di'u khatvei bek l bawldaw'u ding uh bang a si-atna um em?
- Thiamna neilou mimawl hileu le musit lo ding ahi. l chit-ithi-amnau, ibawlthei-isakthei na teu hi Pathian leh inu-ipa apat ahi.
- Nu leh pa ngaichim theilo, senneu apat ah ei lungsiatna teu l damsung ah ditzaw ding gual ahipuai.
- Nu leh pa hi kiphinna, dawi dawi, nawp nawp genna demand bawlna ding bep ah gello ding ahi. A lunggel thachawlnateu chawldamna ding zawk gelding ahi. Proverbs 7:22. Lungthim kipak tak ah umhi damdoi phatak leh damna ahi.
- Chate hawn nu leh pa lungthim sukthona ding leh kipakna dingin- birthday, pate/nute ni, Christmas tiho a thilpiak nei sek ah chawihawi leh achung

ua thilpha bawl zing ding ahi.

- Nu leh pa'n chate hi atha tak-sap, ahatlo hun ah lungsiat tak a jen ding, enkawl di'a a kinep pi'u ahi. Sukgenthei a thasiat saklo ding ahi. Nu leh pa thasiat sak te avangse sek ui. Nek leh chak adu lam uh bawl piak ding, a lupnau achutnau, asil-achen uh sukthiang piak ding, akhut leh kengtin haw'u tan piak ah damdoi te nu piak ding ahi.

Proverb 23:22. "La pa, ahun hingtu thu chu ngai inla, la nu a hung teksiat hun inle mutawm diak ki'n".

Pathian in simtute zosia malzawl ta hen.

--o0o--

CHURACHANDPUR DISTRICT A
CHANCHINPHA (GOSPEL)
HUNGLUT DAN
LEH
MABAN SUNZAWM DING A I MAWPUAKNA'U.

~Rev. Dr. Hangpi Manlun

1). Thumapui: Tuni May, 7, ni chu ei Churachandpur district a chanchinpha (gospel)- hung tunna kum 111-chinna ni, ahitawh kituak a missionary nasep ding dan thu gen thei ding a hun hoi hung pia i Pa Pathian chung ah kipak thu i gen masa ahi. Ei Manipur ah chanchinpha (gospel)- hung tun dan chini in i muthei ui. Ziate chu:

1.i). Apakhatna ah- Manipur Northern lam ah William Pettegrew chu February 6th 1894, Arthington Aboriginessten ahung sawl ua, Imphal ahung tung hi. Ahin, dawí gual ah lawting leh kawt akihawnlo zia kin Ukhrol ah kichawn in, ziazawchun 'Baptist Mission'-te tawh hung kizawp in tu-a unau Baptist a um kochuamte adiakin, Manipur Baptist Convention nuai a umte hi ama gasua ti leh hin kigen khiallo ding ahi.

1.ii) Apanina ahileh- Manipur Southern lam a umte ahiu leh Pu. Watkin Robert tungtawn a chanchinpha (gospel)-mu tute ihu a. Ama ahileh, Dr. P. Fraser-erte nupan toh sapgam a kipa-

tin Aizawl khawpi ah missionary nasem dinga hung kuan ahiu a. Ni khat a lawite khatin pound 5, ama kimatchakna dingin ahung thawt a, aman mawk mat mangthai lo in zia sum chu tawh Chanchinpha Johan zik Lushai (Mizo)- pau a kiletawh bangzat hem khat chaw in ahawm zak ta ahi. A chawmkim in, zia Bible chu zia hun lai ah Senvon hausapu (L)- Mr. Kamkhulun Singson inle copy khat ala mu, simthei louin, a Bible chu a pekit ah, "Pute haw la Bible thu chu kei uh kiang ale hung gen/hilchian in" ti'n athawt hi. Zia mi chu Pu. Watkin Robertin ahia in, Sawlchak Paul in "Mece-donia gam ah hung galkai inla ei hung hukdam ta'n, tia kona

aw achan gual ah a ngai hi". Zia phat chun, Pu. Lungpau leh Thangkaite tawh 7th May, 1910 in Manipur ahunglut ua chanchinpha chi ahung tutau hi.

2). 'Mission' ti chu Latin pau ah 'Missio' apat kiladaw ahia, a umzia chu 'Saw' tina ahi. Chuleh, Greek pau in, 'Apostello' a kitia, zia chu le 'Saw' tina ma tho ahi. Zia tak ah a kipat chun 'Apostle' kiti ei pau a 'Sawlhak' hung piangdaw ahi. A umzia ahileh, sepding/bawding pawimaw (special)-tak a nasem ding a mawpuakna kipia tina ahi. Bible Dictionary gen dan in, missionary chu, "Kochuam in mundang(foreign) ah chanchinpha gen ding ah asawl ahem, zilsaknate, lekhathiamnate, khawtang kichamnate, damtheina leh lampi chuamchuamte a zilsakna petu" a tiu a. Zia kampau 'missionary' ti thu bul chu 1598 AD-a hung kimang pan ahita, a umzia chu 'sawldawk' ahem, 'thawtdawk' ahem tina ahi. Zia, missionary ti kampau chu Jesuit (catholic kochuam chanchinpha gen pawl) in nasem ding a, a sawldaw uh paukam matna inle ala mang masapen ui.

Chuleh, Khristian 'Mission'

ti chun Khristian lote Jesu Khrist kiang ah pulut ding leh Khrist chanchinpha gingloute kiang a gen ding a, sawldawk tina ahi deu pen hi. Ginglou mi leh a he-nailote kiang a Khrist chanchinpha puanna thu genna ahi. Bible ah akimunate ahileh, (Matt. 28:18-20; Luk 24:46-49; Johan 20:21; Nasepte 1:18)-te leh a dangdangte ahiau. Ziate banah, 'Pa'n a chapa Lalpa Jesu a sawl a, Jesu'n a nungzuite a sawl kit a, zia chu mission umzia' diktak ahi.

3). Pathian chu missionary masa pen ahi. Chuleh, Thuthung Lui ah chun Pathian chu thagau mangthai sui masapen ahithu imu'u hi. Aziak ahileh, Adam leh Evi-te chu Eden huan ah Pathian in a kawi lai in, neklou ding a ti sia leh pha hiatna thing ga a nektak ziak un, Pathian in "Adam khawi ah um la hem" ti'n a ko hi. Mithiamte chun zia chu Pathian in mi gilote/thagau mangthaite asuina kampau masapen ahi ti'n agen ui (Gen. 3:8).

Chuleh, Pathian in Abraham le mi dangte a ding a malzawlina hiding in a ko hi (Gen.12). zia banah, Israelte le zia leichung pumpi a vakna tuntu hiding in ala guat a, ahin, Israelten Pathian

lemkuatna leh kinepnate a suk-pitin zo taklo ziakun, A chapa Jesu thisan mang in ei kochuamte ei hung phudawk in, ei hung teldawk ah, tichun mawpuakna kochuamte chung ah a ngata ahi. Missionary nasep chu Pathian lungchang leh tup-le-dawi le ahi.

4). Missionary nasep ding chu thikuan vaithâkna ahi. Lalpa Jesu'n le van a akal ding kuanin, anungzuite kiang ah "Gam tin ah mi nungzui in siam a, a gingte chu Pa leh Chapa leh Thagau thiango min in baptis un" ati (Matt.28:18-20). Chuleh, "Pa'n ei sawl gual in nang uh le ka hun sawl la hi'u" ti ahi (Johan 20:21). Zia vaithâkna chu thikuan vaithâkna le a tithei hi. Pa'n a thikuan ah achate a vaithâkna thu, ti leh hinle kiti khi-allo ding ahi. Zia banah, Nasepte 1:8-ah, "Thagau thiango ahung tun phat leh, Judia gam, Samaria gam leh kawlmawng dâwngin ka thu hiatpite hung hin la'u" ti'n Lalpa Jesu'n thu apia. Ahin, zia thupiak chu kochuam masate chun a zuilo ziakun, a chung ua gawtna atun khawlaw ahi. Vangphat umtakin atai zakna lam un kochuam a phudawk zel sek ua, l gam buai lai ua, ei unle kochuam mun chuamchuam ah ila phu sek

uh tawh le a kibang hi.

5). Mihing man ding in mihing ma a kimang sek hi. Lalpa Jesu'n le Galili dil gei a ngaman a nekhaw! Simon leh Andriate unau kiangah mihing man dingin asawlthu imu'u ahi (Mak.1:16). Mundang ah le mi gilo hukdamna changte chun midang hukdamna chang nailote amat thute le imu'u ahi. Philip leh Ethopia mipa chanchin apat inle imu thei ui (Nasepte 3:27). Zia banah, Paul ahung pianthak phat in abawldingte chu Anania mang in Pathian in ahil hi. Ziate a kipatin, Pathian nasep chu mihingte mang in a hidan i muthei ui.

6). Tuhin, Thagau mi leh mi thupi chuamchuamte'n Missionary nasepna pawimawna a gente uh vak gen hitiu.

6.i). Pathian thugen thiam, Bonheoffer in, "Kochuam in chanchinpha apuanzak leh kochuam ti a minvua tak ding him ahi," ati ahi. 6.ii). Alan Richardson in, "Chanchinpha puanzakna neilo kochuam chu Mission field ahi nalai ui," ati ahi. 6.iii). Emil Brunner in, "Mei chu a kuan phat leh, ahing ah thil abawlthei gualin, kochuam inle missionary na a sepna tawh a hing bep ding ahi" a ti ahi. 6.iv). Oswald J. Smith in,

“Kochuam damlote damsakna damdawi hawipen chu missionary nasep ahi” a chi hi. Aman a gen kitna khat ah, “Jesu’n Vaithum panga leh sanga pani a sukpong lai a nungzuiten mipite sang nga (5000)-valte lak ah a hawmlai un, amasa gualten achang masa ua, gilva tak a um laiun, anunglam achu ten a chang nai pua’u” a tia. Zia gual ah chun, ei un chanchinpha tamveitak l hiat laiun, a hekha nailo leichung ah mi tamtak a um ui” a tia. 6.v). H.W. Bucherin, “Hukdamna thu gen zing mite lungchang sung ah bang tik lai inle thagau thu nisa gualin avak zing in thagau ni a tum ngai puai” a tia.

7). Leichung/Khawvel ah Missionary nasep ding hi akul takzet hi. Leichung/khawvel i et leh Equatorial gamte chu gamthim pen-pente in a kilang ui. Zia gamte ah chun ginglo mi a tam mama ui. World Christian Encyclopaedia 2001-in a taklat danin leichung ah mihing 6,055,049,000-vel umding a hisap ahia, ziate lak ah, 100-za ah 24% (percent)-te chu Pathian umlo (Atheism) kiti pawl ahui. Mihing 100-lak ah 13 (percent)-te chu Hindu sakhua biatute ahui ah, 100-lak a 8 %

(percent)-te chu Budhist sakhua bia ahi kit ua, zia banah, 100-lak 17 %- (percent)-te Muslim sakhua zuitute ahikit uh ahi. Ziate lak ah, Khristiante chu 100-lak ah 33% (percent)-cho l pha bep ui. India gam ale Khristiante chu 100-lak ah 3% (percent)-vel hid-ing a hisap i hi bep ui. I umna uh Manipur ahin le ei Khristiante chu i tawm mama uh ahi.

Zia banah, leichung ah kum chengin nausen 12, 1000, 000-vel piang ding a hisap ahi. Thasin in, nausen 3,36,111-vel-ma piang ding a hisap ahi kit ah, dakkal khat sungin 14,000-vel piang ding a hisap hikit hi. Chuleh, minute khat sungin 233 sang a tamzaw piang ding a hisap ahia, second khat sungin 3-5 vel bang piangzo ding in ahisap ui. Zia naupiangte chu chanchinpha (gospel)- helote ahui ah, ahung pianna innsungteu’ chu ginglo mite innsung ahi tangpi na lai uh ahi.

8). Chanchinpha nasep/gen chu kochuam napi ahi. Chuleh, Missionary nasep chu Kochuamte napi pen ahia, Lal Jesu’n zia napi chu a mite liangkou in anga ahi (Matt. 28:19). Zia, nasep chu Kochuam piting leh piting lo kilatna

pen ahi. Kochuam chu chanchinpha gen ding a phu-leh-din ahiz-iaikin, zia chu a sep a, angaisak lo chun kochuam diktak titâk le hilo ding ahi.

Chuleh, nidang lain, Sappgamte leh a dangdang a Kochuamte'n le ei uh gualin amau tualsung kochuam chiat bep ala en in, ala buaipei mai ta leu chuh, Missionary ala sawl un ei un chanchinpha i he na ding ua le? Amau inle a hun lai un amau tualsung leh mani nawpsakna ding bep ala khual taleu, ei un chanchinpha le mukhalo ding ihu. Ei unle chanchinpha puanzak chu i mawpuakna uh ahilam l het ua, theitawpsua in i sem zing ding uh ahi.

Chanchinpha gen chu, Kochuam na bakkhat mai bep hilo in, kochuam pumpi ten hattak leh theitawpsua ah i sep ding i liengkou ua kinga ahi. Lalpa Jesu'n leichung pumpi a vei a, zia chu, Ama taksa a thina leh kip-iaikna a lang Chiang mama hi. Pathian miten mi zosia Pathian mi-leh-sa ahung hitheina ding uh chu a nasep uh ahi. Mei chu a kuan ah/katziak ah a hin gualin, kochuam le chu chanchinpha na asepi ziaikin a hingto zelzel ding ahi.

Ahin, Kochuam piting lote'n, amau tualsung a kisuklimna dingte maimai a buaipei un akiseng tam thei mama ua, zia gualah a tualsung a kisenbei chu Pathian mite kipiakna sangtak hi in le a ngai ui. Kochuam ahung piting leh vang chanchinpha puanzak dan lampi pen chu angai pawimaw pen ui.

9). Pathian nasep lo Nam leh Kochuamte chu a mangthai ding ahui. l gen tâk gual un, Kochuam chu a phuttu leh aneitupa Lalpa Jesu ahiziakin, khawvel adin ah kipat tuni dawng tiang in dona nasatak ala tuak zing hi. Ahin, la-phuaktu'n, "Lei a Lalten do maleu le agam hung lian deudeu zawn" ati gual in dona nasatak kal ah kochuam chu a ding det zing hi. Lalpa Jesu "Zia suangpi chung ah Ka kochuam din ingka tin, mi thi khua kul kawtkhakten zo ta puana'u" ati chu a dik mama hi (Matt.16:18).

10). Thukhakna- Atawpna ding in: Missionary nasepna ding ah ibawn un i pangthei ua. Ziate chu ahileh, Avakuan pawl, sum-leh-pai a pang ding pawl leh a pauchap pawl tite ahi. Ziaziakchun, khat bek a pang ve ding in pan lathak zing hitiu, Lalpa'n simtute hung malzawl taken.

Pate Ni thucha

~Rev. Thiandam Vaiphei
Zomi Christian Fellowship, Guwahati
Guwahati, 17th May 2021

1. Naupang chu ahun lai ah thupha leh thudik Pathian zadan zil saktu PA chu suangmantam sanchi sanga mantam zaw go-khawltu ahi, a ziak chu naupang chu a hung piting tiat tiat dungzui in umchanpha leh diktatna tawh hung piting dawk di ahi ziak in. Chun, pa pha leh Pathian zataka hinkhua mang zing PA chun naupang chu thudik leh thudiklo kawm mui a hiatthiam sak sek hi. Chuleh, naupang a di'n a nu leh a pa chu khawvel ah amu masak pen, a melhiat masak pen, a hotuu masa pen, a ngainat pen uh ahi sek ui. Pathian zatak kawm ah Naupang enkawl zing nu leh pa chun Naupang hinkhua'n gapha a tu lut ziak un, Naupang chu a hung piting tiang in Pathian zana tawh a hung khawsa khawm di ahi.

Ahin, Pathian zalo nu leh pa chun naupang chu zalen tak in a um sak ua chuleh, naupang chu a piting tiang un zalen na dawm zing di ahiu, a ziak chu a

nu leh pan a neu ua pat zalen a a piak tak ziak un. Naupang lung hawlta lua nu leh pa chu a tektiang un chate lung hawl in damsung hinkhua mang di ahiu. Zia ziaka chun naupang chu ahun lai in thunun gua'n lah a piting tianga thununna hinkhua pha tawh ahung piting thei na ding in thupha tupiak in. Pathian zadan helo insung apat naupang hung khanglian chu insung, kochuam sung, khawtang a dingin mi buai um ahung hi sek uh ahi. Zia ziaka chun naupang chu ahun lai in diktatna'n thunun in.

2. Pathian nei insung khat "PA" chun naupang chu aneu apat in pauchap dan, bible sim dan, chuleh Pathian biak a pawm maw dan te chu a tak [action] in a hiat thiam sak sek hi. Naupang chun action pang lo in thil hiat thiam hak a sak sek ziak un nu leh pa pil chun chapang chu action in a thunun di him uh ahi. Ahin, Pathian ngainep "PA" chun hinkhua'n sum

leh pai, hausat a lul dan te nisi'n in a holim pi sek hi. Zia gual ma chun naupang chu a hung piting tiangin Pathian sangin khawvel thil te chu ahung ngaina zaw sek uh ahi. Nu leh pa'n Pathian sangin khawvel thil te ahung ngai nat zawk ua leh chate chun khawvel leh a sunga umte chu aleni'n a ngai nat zawk diu chu hiat sa ahi. Zia ziaka chun naupang chu ahun lai in khawvel thil sangin Pathian thu khawk mu zawn.

3. Insungkhat "PA" Pathian za-ta-ka hinkhua mang zing chu Pathian in ahemil ngai lo di ahi. Pathian za leh thudik dawizing PA chun naupang chung a chun thudikna tawh vaihawm in tin chuleh, zia gual insung PA thuzil sakna hung piting naupang chun thudik leh diklo, lampi pha leh lampi sia hung hekhen thei in na. Ahin, Insunga diktatna leh thudikna ahung piang lo tak leh chu kochuam sung, khawsung, society sung ah thudikna apiang ngai lo di ahi. PA in cha chu diktatna leh thupha'n a thunun zaw ahi chun "khanglai camp," "naupang camp," "nute camp," "pate camp," "revival" bawl ngai se se ta lo di ahi. Tunin bang ziak in revival

kingai na zing, ahi lo leh bang zia kin camp kingai na zing ahem l ti chun, insung apat thupha a hung pawt tawm ziak ahi sek hi.

4. Kum sawm ahi loleh kum sawmni zaw ah insung nuam, kochuam Thagau pawlna, soceity khangto l dawu ua chun tu-apat naupang chu thupha leh thudik ziltin. Bangkim chung ah thupha leh lampi dik ahung pawtna dinga chun nu leh pa'n lampi dik zui phawt a pawu maw hi. Nu leh pa chate ma-ang, annkuang mai ah ki nial zing leh kina zing chu chate a dingin siatna kalbi hawi tak ahi sek hi. Nu leh pa Pathian zatak leh thiango taka kilungsiatna hinkhua mang chate a dinga chun umchanpha kalbi hawi tak ahi kit hi.

Nu leh pa lungthim phalo chuleh Pathian biakin ngaikhawlo te cha chu a hung piting tak ua leh khawlai ah nunchan gensim ahi sek ui. Zia ziak a chun hun chia sa sankit theilo te ngai tua lo in, masang ah gapha hung piang di, gapha hung sua di te chu mu gua'n del in del zaw tan.

‘DAMNA AW’ PHUNGVUKTUTE :

PATRON MEMBERS :

- | | |
|-----------------------|-------------------------------|
| 1. Pu P. Vaiphei IAS, | Imphal |
| 2. Upa Henthianthang, | S.Kotlian |
| 3. T.Upa Haulallawm | S.Kotlian |
| 4. Upa Thienkhomang | S. Kotlian |
| 5. Upa Laltinkhup, | HQ. Church, Tuibuang |
| 6. Pi Manliankim, | HQ. Church, Tuibuang |
| 7. Upa D. Mina, | Lingsiphai |
| 8. T.Upa Ph. Gena, | Lingsiphai |
| 9. Pu. Khamlal | Saipum |
| 10. Pu Khamliankap | Saipum |
| 11. Pu. Tinlunlal | Saipum |
| 12, Pu. S.Kapbawi | New Delhi |
| 13. Upa Genhau | Central Church, Compound veng |
| 14. Pu. Khailianbawi | Central Church, Compound veng |
| 15. Pi Kimtawi | Kohima |
| 16. Tv. Daniel | Tangmual |

MEMORIAL GIFT :

- | | |
|--------------------------------|--|
| 1. Pi Deem Melody, | Central Church, (Rengkai)
<i>[In loving memory of (L) Upa Lamthianlal]</i> |
| 2. Pi Rebekah | Kangvai
<i>[In loving memory of (L) Pastor Khaivung]</i> |
| 3. Upa Liansawmthang | Lingsiphai
<i>[In loving memory of (L) Pu. Henzagen]</i> |
| 4. Pi. Nem Grace Boisi Capvung | Delhi
<i>[In loving memory of (L) Pi Vanlalchhuangi]</i> |

SUPPORTING MEMBERS :

- | | |
|---------------------------|-----------------|
| 1. Upa Khomlunlal | S.Kotlian, |
| 2. Pu. S.Thangminlian | Lingsiphai, |
| 3. Pu Lelboi, | Lingsiphai |
| 4. T.Upa Lalneilian | Central Church, |
| 5. Pu EL Soson | Central Church |
| 6. T.Upa Genminthang, | Central Church, |
| 7. Pi. Kimneihawi | Saipum |
| 8. T.Upa J. Mark | Saipum |
| 9. Pu Genthiankap, | Nghathal |
| 10. Pu Lianzakhup | Nghathal. |
| 11. Pu Lemthang | L. Mission Veng |
| 12. Rev. S.T.Kaia Vaiphei | Nghathal |
| 13. Nk. Dimkhoniang | Zikpi Tampak |

ENCOURAGING MEMBERS :

- | | |
|-------------------|-----------------|
| 1. Pu K. Minlian | Tangmual, |
| 2. Upa Ph. Kamlam | L. Champhai, |
| 3. Upa S.T.Siam, | L. Mission Veng |
| 4. Pi Chhungi | Hq. Tuibuang |
| 5. Pu S. Paumuan | Saipum |

Damna Aw monthly magazine hi tutiang ahin kochuamte'n phungvukna i bawlte'u ziaka hin chiazal i hiu a, kuale phungvukna bawl utte a ding in bangtik lai in le bawlthei zing ahi.

(i). Patron member- Kum 3 (three) a ding in. ₹. 3,000/-

(ii). Memorial Gift- Kum 2(two) a ding in. ₹. 2,500/-

(iii). Supporting member- Kum2(two) a ding in ₹. 2,000/-

(iv). Encourager- Kum 1(one) a ding in. ₹. 1,000/-

Chun, sum thawt nuamte a ding in:

A/C name: Khuga Sadar Presbytery(MPCS)

A/C nos: 32483318505

Branch code: 6182, CCpur

CIF nos: 86412486695

IFSC nos: SBINOOO6182.